



ЎЗБЕКИСТОН РЕСПУБЛИКАСИ МАРКАЗИЙ БАНКИ БОШҚАРУВИ
Қ А Р О Р И

№ 999

2022 й. " 24 " сентябрь

№ 21/8

Тошкент ш.

**Ўзбекистон Республикаси Марказий банкнинг коррупцияга қарши
курашишга оид ички норматив-ҳуқуқий ҳужжатларни
такомиллаштириш тўғрисида**

Ўзбекистон Республикасининг “Давлат фуқаролик хизмати тўғрисида”ги ва “Коррупцияга қарши курашиш тўғрисидаги” қонунларида белгиланган коррупцияга қарши курашишга оид талабларини амалга ошириш ҳамда Марказий банкнинг коррупцияга қарши курашиш соҳасидаги ички норматив-ҳуқуқий ҳужжатларини такомиллаштириш мақсадида, Марказий банк бошқаруви

ҚАРОР ҚИЛАДИ:

1. Қуйидаги ички норматив-ҳуқуқий ҳужжатлар:

Ўзбекистон Республикаси Марказий банкнинг коррупцияга қарши курашиш Сиёсати 1-иловага;

Ўзбекистон Республикаси Марказий банк тизимида манфаатлар тўқнашувини аниқлаш ва бошқариш тўғрисидаги Низом 2-иловага;

Ўзбекистон Республикаси Марказий банкида коррупцияга қарши курашиш тизимининг ҳолати тўғрисидаги ҳисоботни шакллантириш ва тақдим этиш тўғрисидаги Низом 3-иловага;

Ўзбекистон Республикаси Марказий банк тизимида ишга қабул қилинаётган номзодларни ўрганиш тўғрисидаги Йўриқнома 4-иловага;

Ўзбекистон Республикаси Марказий банк тизимида ходимларни этика ва коррупцияга қарши курашиш соҳасида ўқитилишини ташкил этиш тўғрисидаги Йўриқнома 5-иловага;

Ўзбекистон Республикаси Марказий банк тизимида контрагентларни ўрганишга оид Йўриқнома 6-иловага;

Ўзбекистон Республикаси Марказий банк тизимида алоқа каналлари орқали коррупциявий хатти-ҳаракатлар ҳамда манфаатлар тўқнашуви тўғрисида келиб тушган хабарларни қабул қилиш ва кўриб чиқиш Регламенти 7-иловага;

Ўзбекистон Республикаси Марказий банк тизимида ходимларнинг коррупциявий хатти-ҳаракатлари ва одоб-ахлоқ қоидаларини бузиш ҳолатлари устидан хизмат текширувларини ўтказиш Регламенти 8-иловага;

Ўзбекистон Республикаси Марказий банкида коррупциявий хавф-хатарларни баҳолаш Услубиёти 9-иловага;

Ўзбекистон Республикаси Марказий банк тизимида коррупцияга қарши тартиб-таомилларнинг самарадорлигини мониторинг ва назорат қилиш Услубиёти 10-иловага мувофиқ тасдиқлансин.

2. **Комплаенс-назорат ва ички аудит департаменти (Ш.Куваталиев)** Марказий банкнинг коррупцияга қарши курашиш соҳасидаги ички норматив-ҳуқуқий ҳужжатларида белгиланган тартиб-қоидаларни амалиётга татбиқ этилишини ҳамда уларнинг самарадорлиги мониторинг қилиб борилишини таъминласин.

3. **Кадрлар билан ишлаш департаменти (В.Хамроқулов)** ҳамда **Комплаенс-назорат ва ички аудит департаменти (Ш.Куваталиев)** мазкур қарор талабларидан келиб чиқиб, бир ой муддатда барча ходимларни Марказий банкнинг коррупцияга қарши курашишга оид ички меъёрий ҳужжатлари талаблари билан таништиради, ўқув семинарларини ташкил этилишини таъминласин.

4. **Марказий банк Бошқарувининг 2001 йил 23 июндаги 14/12-сонли қарори билан тасдиқланган “Марказий банк тизимида Хизмат текширувлари ўтказиш тартиби тўғрисида”ги Низом ҳамда Марказий банк Бошқарувининг 2020 йил 26 декабрдаги 28/24-сонли қарори билан тасдиқланган “Ўзбекистон Республикаси Марказий банкнинг коррупцияга қарши курашиш Сиёсати” ўз кучини йўқотган ҳисоблансин.**

5. Мазкур қарорнинг ижросини назорат қилиш **Марказий банк раиси ўринбосари Б.Ю. Абубакиров** зиммасига юклатилсин.

Марказий банк раиси



М.Б. Нурмуратов

Ўзбекистон Республикаси
Марказий банки бошқарувининг
2022 йил “24” сентябрдаги
21/8 - сонли қарорига
8 – илова
№ 999

**Ўзбекистон Республикаси Марказий банки тизимида ходимларининг
коррупциявий хатти-ҳаракатлари ва одоб-ахлоқ қоидаларини бузиш
ҳолатлари устидан хизмат текширувлари ўтказиш бўйича**

РЕГЛАМЕНТ

1-боб. Умумий қоидалар

1. Мазкур Регламент Ўзбекистон Республикаси Марказий банкнинг марказий аппарати, ҳудудий бош бошқармалари ва тасарруфидаги ташкилотлар (кейинги ўринларда - Марказий банк тизими) ходимлари томонидан Ўзбекистон Республикасининг коррупцияга қарши курашишга оид қонунчилиги ёки коррупцияга қарши курашишга оид ички идоравий ҳужжатларини ҳамда “Ўзбекистон Республикаси Марказий банки ходимларининг одоб-ахлоқ қоидалари”ни бузилишига нисбатан хизмат текширувини (кейинги ўринларда-хизмат текшируви) ўтказишни белгиловчи ички идоравий ҳужжати ҳисобланади.

2. Мазкур Регламент қуйидаги мақсадларда ишлаб чиқилган:

Марказий банк тизимида хизмат текшируви ўтказишга ягона ёндашувни белгилаш;

хизмат текшируви ўтказиш жараёни ва натижаларини ҳужжатлаштириш талабларини белгилаш;

қоидабузарликларни содир этиш сабаби, имкон берувчи шарт-шароитларни аниқлаш ва бартараф этиш;

ички норматив-ҳуқуқий ҳужжатлар ва назорат таомилларидаги камчиликларни аниқлаш ва такомиллаштириш юзасидан тавсияларни бериш;

қонунчилик талабларини бузилиши бўйича жавобгарликка тортилиш хавфини камайтириш.

3. Хизмат текширувида иштирок этаётган ходимлар зиммасига ушбу Регламент талабларига риоя этши учун шахсий жавобгарлик юклатилади.

4. Хизмат текширувини ўтказишда қуйидаги тамойилларга асосланилади:
қонунийлик;

ходимларининг ҳуқуқ, эркинликлари ва қонуний манфаатларига риоя қилиш;
фуқаролар ҳуқуқ ва эркинликларинини таъминлаш ва ҳимоя қилиш;
олинган ахборот ва материалларнинг конфиденциаллиги;
хизмат текширувини ўтказишда шаффофлик, ҳалоллик, коллегиялик,
бетарафлик ва холислик ҳамда ходимнинг айбсизлик презумпцияси.

2-боб. Хизмат текширувни тайинлаш

5. Хизмат текшируви ходимлар томонидан Ўзбекистон Республикасининг қонунчилиги, Марказий банкнинг ички норматив-ҳужжатлари ёки одоб-ахлоқ қоидаларини бузилганлиги тўғрисидаги асосли маълумотлар мавжуд бўлганда унинг муҳимлигидан келиб чиққан ҳолда тайинланади.

6. Бундай маълумотлар қуйидаги манбалардан олинishi мумкин:

ходимларнинг ёзма ёки оғзаки шаклда берган маълумоти (мурожаати);

Марказий банкнинг алоқа канали орқали жисмоний ва юридик шахсларнинг юборган хабарлари, мурожаатлари;

оммавий ахборот воситалари ва ижтимоий тармоқлардаги маълумотлар;

ўтказилган сўровнома, шу жумладан, ижтимоий ва статистик тадқиқотлар натижалари бўйича олинган маълумотлар;

Ички назорат тузилмаси томонидан ўтказилган мониторинг ва назорат натижалари;

Коррупцияга қарши курашиш агентлигининг ҳамда ҳуқуқни муҳофаза қилувчи органларнинг сўровлари, тақдимномалари;

Ўзбекистон Республикаси Президенти, Вазирлар Маҳкамаси, бошқа ваколатли давлат органларининг топшириқлари.

7. Марказий банкда қуйидагилар хизмат текшируви ташаббускорлари бўла олади:

Ўзбекистон Республикаси Марказий банк Раиси ва унинг ўринбосарлари;

Ўзбекистон Республикаси Марказий банкининг мустақил таркибий бўлинма раҳбарлари, ҳудудий бош бошқарма бошлиқлари, тасарруфдаги ташкилотлар раҳбарлари;

Одоб-ахлоқ комиссияси;

Ички назорат тузилмаси.

8. Келиб тушган маълумотнинг асосли, Марказий банк тизими ходимларига алоқадор, шунингдек муҳим эканлигини аниқлаш мақсадида дастлабки текширув амалга оширилади.

9. Дастлабки текширув маълумот келиб тушган кундан бошлаб 5 (беш) иш кундан ортиқ бўлмаган муддатда ўтказилади. Дастлабки текширув хизмат текшируви ҳисобланмайди.

10. Дастлабки текширув натижалари Марказий банк тизимига алоқадор бўлган қоидабузарлик содир этилгани тўғрисида тахмин қилишга етарли асос борлиги аниқланиб, муҳим деб топилса Ички назорат тузилмаси Марказий банк раҳбариятига ёзма хизмат хабарини тақдим этади.

Худудий бош бошқармалар ҳамда тасарруфидаги ташкилотларда хизмат хабарини раҳбарга ва бир вақтнинг ўзида Марказий банк марказий аппаратининг Ички назорат тузилмасига тақдим этади.

11. Раҳбар хизмат хабарини олган кундан бошлаб 3 (уч) иш кунида хизмат текширувини ўтказиш ёки ўтказмаслик тўғрисида қарор (буйруқ) қабул қилади. Бунда, хизмат текшируви ўтказилмасдан материалларни ҳуқуқни муҳофаза қилиш органларига тақдим этиш тўғрисида қарор қабул қилиниши мумкин.

12. Хизмат текшируви ўтказиш тўғрисида қарор қабул қилиш билан бир вақтда хизмат текшируви ўтказиш бўйича комиссия раҳбари тайинланади. Унинг зиммасига гуруҳ таркибини шакллантириш ва хизмат текширувини ўтказиш тўғрисида буйруқ (фармойиш)ни расмийлаштириш вазифаси юкланади.

13. Худудий бош бошқармалар, тасарруфидаги ташкилотларнинг раҳбар ходимларига нисбатан тайинланган хизмат текширувига Марказий банкнинг марказий аппарати ходимлари жалб қилинади.

3-боб. Хизмат текшируви ўтказиш бўйича комиссияни тузиш

14. Хизмат текшируви ички назорат тузилмаси, кадрлар билан ишлаш бўлинмаси, юридик хизмат ва бошқа тегишли таркибий бўлинмалар ходимлари, шунингдек касаба уюшмаси вакилидан иборат комиссия томонидан амалга оширилади.

15. Комиссия таркибига Марказий банк раҳбарияти (худудий бош бошқарма бошлиғи, тасарруфдаги корхона раҳбари) ҳамда манфаатдор бўлган шахслар жалб этилмаслиги керак.

16. Комиссия аъзоларида манфаатлар тўқнашуви ҳолати мавжуд эмаслигига комиссия раҳбари ишонч ҳосил қилиши лозим.

4-боб. Хизмат текширувини ўтказиш

17. Хизмат текширувининг муддати 15 иш кундан ортиқ бўлмаслиги керак.

18. Хизмат текшируви жараёнида кўшимча тартиб-таомиллар ўтказилиши, аниқлаштирувчи маълумотлар ёки ҳужжатлар олинишида кўшимча муддат талаб этилса, комиссия раҳбари текширувини тайинлаган раҳбарни хабардор қилган ҳолда текширув муддати яна 15 иш кунигача узайтирилиши мумкин.

19. Хизмат текшируви вақтида тегишли ходим иш жойида бўлмаганда (таътил, касаллик, хизмат сафари ва бошқалар) текширув муддати кўчирилиши мумкин.

Хизмат текширувида ходимнинг иштироки имконсиз бўлса ёки ходим бошқа усул билан иштирок этишдан бош тортса хизмат текшируви ходимнинг иштирокисиз ўтказилиши мумкин. Ушбу ҳолат хизмат текшируви натижаларида қайд этилади.

20. Зарур ҳолларда, буйруқ асосида хизмат текшируви тайинланган ходимга нисбатан иш фаолиятига доир вақтинчалик чекловлар, жумладан ахборот тизимлари, муайян ҳужжатлардан фойдаланишга чеклов, айрим хона ва биноларга киришга таъқиқ, ишдан четлаштириш ёки бошқа чекловлар қўлланилиши мумкин.

Чекловлар қўлланилган ҳолларда буйруқ билан ходим таништирилади, ходим рад этса бу ҳақида далолатнома тузилади.

21. Қоида тариқасида, ходимга нисбатан маълум бир ахборот тизимлари, муайян ҳужжатлардан фойдаланишга чеклов қўйишга оид буйруқ хизмат текшируви ўтказишнинг муддатидан ортиқ бўлмаслиги керак.

5-боб. Хизмат текширувини ўтказиш давомида ўрганиладиган маълумотлар

22. Хизмат текширувини ўтказиш давомида комиссия қоидабузарликка алоқадор бўлган маълумотларни тўплаш, таҳлил қилиш ва ҳужжатлаштириш ишларини амалга оширади, шу жумладан:

хизмат текшируви тайинланишига сабаб бўлган вазиятнинг асослилиги;
аниқланган қоидабузарлик ва уни содир этиш сабаблари;
қонунчилик ёки ички идоравий ҳужжатларга хавола (бандлари билан);
қоидабузарликни содир этишда иштирок этган шахслар доираси;
етказилган моддий ва номоддий, обрў-эътибор характеридаги зарарнинг кўриниши ва кўлами;
ходимнинг тушунтириш ва ёзма равишдаги талабларида кўрсатилган вазият;
қоидабузарликка алоқадор бўлган бошқа маълумотлар.

23. Хизмат текширувини ўтказиш давомида олинган маълумотлар манбаси куйидагилар бўлиши мумкин:

хизмат текширувидаги ходим, Марказий банкнинг бошқа ходимлари, учинчи шахсларнинг ёзма ёки оғзаки тушунтиришлари;
тасдиқловчи ҳужжатлар (ёзма ва электрон шаклда);
интернет тармоғининг очиқ ахборот манбаларининг маълумотлари;
аудиоёзувлар, фото- ва видеосъёмкалар;
қоидабузарликка алоқадор бўлган бошқа материаллар.

24. Юқорида санаб ўтилган барча, шу жумладан конфиденциал маълумотлар комиссия томонидан, Ўзбекистон Республикаси қонунчилиги ва Марказий банкнинг ички ҳужжатларига мувофиқ қабул қилинган барча таомилларни қўллаган ҳолда олиниши ва фойдаланилиши керак.

25. Марказий банк ходимлари ёки жалб этилган бошқа шахслар билан ўтказилган суҳбат жараёнини аудио ёки видео шаклида қайд қилиниши, суҳбат тўғрисида баённома тузилиши мумкин (аудио ёки видео қайд хизмат текшируви материалларига қўшиб қўйилади).

Аудио ва видео қайдни амалга оширишдан олдин, суҳбат ўтказилаётган шахснинг розилиги олинади. Розилик берилмаса, суҳбат жараёнида аудио ва видео қайдни амалга оширувчи ускуналардан фойдланишга йўл қўйилмайди.

26. Ходимлар хизмат текшируви жараёнида суҳбат ёки тушунтириш беришдан бош тортган ҳолларда 1-иловага мувофиқ далолатнома расмийлаштирилади.

6-боб. Комиссия раҳбари ва аъзоларининг ҳуқуқ ва мажбуриятлари

27. Комиссия раҳбари хизмат текширувининг самарадорлиги ва натижаси, шунингдек, комиссия аъзоларининг мазкур Регламент билан белгиланган талабларга амал қилишлари учун маъсул бўлади.

28. Хизмат текширувини ўтказишда комиссия раҳбарининг вазифалари:

хизмат текшируви ўтказишнинг йўналишлари, амалга ошириладиган тадбирларни белгилайди, комиссия аъзолари олдига вазифалар қўяди;

хизмат текшируви ўтказилишини ташкиллаштиради ва мувофиқлаштиради;

хизмат текшируви ушбу Регламентга мувофиқ равишда ўтказилишини назорат қилади;

хизмат текширувини ҳолис ва самарали ўтказиш учун зарур бўлган чоралар кўрилишини таъминлайди;

хизмат текшируви натижаларини раҳбариятга тақдим этади.

29. Хизмат текширувини ўтказувчи комиссия аъзоларининг ҳуқуқлари:

ходимлар билан суҳбат ўтказиш, тушунтириш хати олиш, текширув моҳияти тўғрисида маълумотга эга бўлиши мумкин бўлган учинчи шахслар, шунингдек, Марказий банк раҳбарияти билан келишилган ҳолда ташқи экспертларни жалб қилиш;

суҳбатни ёзма шаклда ёки заруриятга кўра, аудио ва видеоқайд этувчи ускуналар қўллаш орқали қайд этиш;

хизмат текширувига алоқадор бўлган материалларни ходимлардан олиш.

30. Комиссия раҳбари ва аъзолари мажбуриятлари:

хизмат текширувини ўтказишда қонунчилик, ушбу Регламент ва бошқа тартибга солувчи ички ҳужжатлар талабларига риоя этиш;

хизмат текшируви учун аҳамиятга эга бўлган маълумотларни (ҳужжатлар, электрон маълумотлар) бутлигини сақлаш чораларини кўриш;

хизмат текширувини ўтказиш даврида эга бўлинган маълумотлар конфиденциаллигини сақлаш ва ошкор қилмаслик.

7-боб. Хизмат текшируви тайинланган ходимнинг ҳуқуқлари

31. Хизмат текшируви тайинланган ходим(лар) қуйидаги ҳуқуқларга эга:

хизмат текшируви ўтказилиши тўғрисида хабардор бўлиш;

қоидабузарликнинг содир этилиши сабаблари ва шароитлари, хизмат текширувининг бориши ҳақида ўз фикр-мулоҳазаларини ифодалаш ҳуқуқи билан ёзма ва оғзаки тушунтиришлар бериш, шунингдек, исбот-далилларни тақдим этиш;

тақдим этган маълумотлари, тушунтиришлари ва бошқа текширув материалларига алоқадор бўлган ҳужжат ёки фактларни қўшиб қўйишни талаб қилиш;

хизмат текшируви тугаганлиги тўғрисидаги хабарни олиш ва хизмат текшируви натижаси билан танишиш;

хизмат текшируви натижаларидан, шу жумладан, комиссия томонидан текширув яқунлари бўйича таклиф этилган жавобгарлик чорасидан норози бўлган тақдирда, ушбу қарор устидан Марказий банк раҳбариятига (тасарруфдаги ташкилот раҳбарига) ёки қонунчиликда кўзда тутилган бошқа ваколатли идораларга шикоят қилиш.

8-боб. Хизмат текширувини ўтказишга жалб қилинган бошқа ходимларнинг ҳуқуқ ва мажбуриятлари

32. Хизмат текширувини ўтказишга жалб қилинадиган ходимлар, хизмат текширувини ўтказишда комиссияга ҳар томонлама қўмак бериш, шу жумладан, хизмат текшируви бўйича талаб қилинган тушунтиришлар, маълумот ва ҳужжатларни тақдим этишлари, комиссия аъзолари томонидан ташкил этиладиган суҳбатларда иштирок этишлари шарт.

33. Хизмат текширувини ўтказишга жалб қилинаётган ходимлар уларнинг текширувда иштирок этиш жараёнида уларга маълум бўлган хизмат текшируви маълумотларини ошкор қилишга ҳақли эмаслар.

34. Хизмат текширувини ўтказишга жалб қилинаётган ходимлар қуйидаги ҳуқуқларга эга:

ўзлари ва яқин қариндошларга қарши гувоҳлик бермаслик;

Марказий банк раҳбариятига комиссия раҳбари ва аъзоларининг ҳаракатлари (ҳаракатсизлиги) устидан шикоят қилиш.

9-боб. Хизмат текшируви натижаларини расмийлаштириш

35. Хизмат текшируви натижалари бўйича далолатнома тузилиб, комиссия раҳбари, унинг барча аъзолари, хизмат текшируви тайинланган ходим томонидан имзоланади. Агар ходим имзо қўйишдан бош тортса, у ҳолда комиссия раҳбари

далолатномага тегишли белги қўяди ҳамда хизмат текшируви натижаларидан манфаатдор бўлмаган камида икки нафар шахс имзо қўйиши лозим.

Далолатномага (ёки бошқа ҳужжатларга) имзо қўймаслик ходимга нисбатан тегишли жавобгарлик чорасини қўллашдан озод қилмайди.

36. Далолатнома, унинг алоҳида бандларидан норози бўлган комиссия аъзоси ёки хизмат текшируви тайинланган ходим (шахс) ўз фикрини ёзма равишда ифодалаб, алоҳида қайд билан далолатномага имзо қўйиши мумкин.

37. Қоидабузарлик ҳолатлари тасдиқланса далолатнома асосида ходимга нисбатан жавобгарлик чоралари, шунингдек, қоидабузарлик сабаблари ва қоидабузарликни содир этишга туртки бўлган шартларни бартараф этиш имконини берадиган чораларни қўллаш бўйича таклифлар тайёрланади.

38. Далолатномага асосан, Марказий банк раҳбарияти (худудий бош бошқарма бошлиғи, тасарруфдаги ташкилот раҳбари) қуйидаги қарорларни қабул қилиши мумкин:

қоидабузарлик ҳолати тасдиқланмаганлиги сабабли чора кўрмаслик;

сабабларини кўрсатган ҳолда хизмат текшируви материалларини қўшимча ишлаш учун қайтариш;

айбдор ходимни интизомий жавобгарликка тортиш;

ходимга нисбатан огоҳлантириш, профилактик характердаги чораларни қўллаш;

келгусида шу каби қоидабузарликлар содир бўлишининг олдини олиш бўйича тегишли чора-тадбирларни ишлаб чиқиш;

ҳуқуқбузарлик ёки жиноят аломатлари тасдиқланган ҳолда, тегишли материалларни ҳуқуқни муҳофаза қилиш органларига тақдим этиш.

39. Барча хизмат текшируви натижалари Ички назорат тузилмасига ва кадрлар билан ишловчи таркибий бўлинмаларга тақдим этилади.

40. Хизмат текшируви ўтказилишига сабаб бўлган маълумот ҳақида хабар берган шахслар қоидабузарлик тасдиқлангани ёки тасдиқланмагани, шунингдек кўрилган чоралар ҳақида умумий тарзда хабардор қилинади.

10-боб. Хизмат текширувига оид ҳужжатларни сақлаш ва улардан фойдаланиш

41. Хизмат текширувида иштирок этаётган ходимлар текширув давомида уларга маълум бўлган ахборотнинг конфиденциаллигини таъминлайдилар, қонунчиликда кўзда тутилган ҳолатлар бундан мустасно.

42. Хизмат текширувига оид маълумотлардан фойдаланиш ҳуқуқига фақат Марказий банк раҳбарияти, ички назорат тузилмаси, кадрлар билан ишлаш бўлинмаси ва комиссия аъзолари эга. Бошқа ходимлар Марказий банк раҳбариятининг (тасарруфдаги ташкилот раҳбари) ёзма розилигини олиши лозим.

43. Хизмат текширувига оид материаллар комиссия раҳбари томонидан алоҳида йиғмажилдга рақамланган ва тикилган ҳолда ички назорат тузилмасига топширилади.

44. Ички назорат тузилмаси, мазкур Регламентга 2-иловага мувофиқ шаклда хизмат текширувлари реестрини юритилишини таъминлайди. Тасарруфдаги ташкилотларда ўтказилган хизмат текширувлари реестрини ташкилотнинг ички назорат тузилмаси юритади.

45. Хизмат текширувига оид барча ҳужжатлар, агар бошқача тартиб Ўзбекистон Республикаси қонунчилигида кўзда тутилмаган бўлса, тасдиқланган вақтдан бошлаб 5 (беш) йил давомида сақланиши лозим.

Департамент директори



Ш. Қуваталиев

Ўзбекистон Республикаси Марказий банки
тизими ходимларининг коррупциявий хатти-
харакатлари ва одоб-ахлоқ қоидаларини
бузиш ҳолатлари устидан хизмат
текширувлари ўтказиш бўйича регламентга
1-илова

ДАЛОЛАТНОМА

«__» _____ 20__ й.

Биз, қуйида имзо қўювчилар

(ФИШ, лавозими)

(ФИШ, лавозими)

(ФИШ, лавозими)

Ходим (ФИШ, лавозими) 20__—йилнинг «--»да

дан иборат бўлган қоидабузарлик содир этилганлиги тўғрисида ёзма
тушунтириш бериш таклиф этилган бўлиб, у ёзма тушунтириш беришни рад этгани
тўғрисида ушбу далолатномани туздик.

Ёзма тушунтириш беришни рад этганлиги сабабларини ходим (ФИШ, лавозими)
қуйидагилар билан изоҳлади

(тушунтириш беришни рад этганлик сабаблари эркин шаклда баён этилади).

Далолотнома тузган шахслар имзоси: _____
(имзо) (ФИШ)

(имзо) (ФИШ)

(имзо) (ФИШ)

Далолотнома билан танишдим*: (ФИШ, лавозим, сана, имзо) _____

* Далолотномага имзо қўйишдан бош тортса, комиссия раҳбари «имзолашдан бош тортди»
ёзувини киритиб, ўзи имзо қўяди.

Ўзбекистон Республикаси Марказий банки тизими
 ходимларининг коррупциявий ҳагги-ҳаракаглари ва одоб-ахлоқ
 қоидаларини бузиш ҳолатлари устидан хизмат текширувлари
 ўтказиш бўйича регламентга 2-илова

Хизмат текширувлари (электрон) реестри

Т/р	Хизмат текшируви ўтказиш тўғрисидаги буйруқ рақами ва санаси	Ўтказилган Хизмат текшируви натижалари тўғрисидаги далолатнома рақами ва санаси	Хизмат текшируви ўтказиш даври	Комиссия таркиби	Қондабузарлик тўғрисидаги ахборот келиб тушган манба	Хизмат текшируви ўтказиш йўналишларининг қисқача таърифи	Текширув натижаларининг қисқача таърифи	Аниқланган айбдор шахслар рўйхати	Текширув натижалари бўйича тасдиқланган чоралар	Муддатлар ва ижро учун маъсул	Амалда бажарилганлик тўғрисидаги ахборот
1	2	3	5	6	7	8	9	10	11	12	13
1											
2											
3											
4											
5											
...											